

ɲwa wù kingane kinfɛɛ wu
Bitá
Fiɛ fi le a ɲwa wu Bitá wù
kingane kinfɛɛ wunɛ le

ɲwa wu Bitá wù kingane kinfɛɛ wunɛ le wu gè san fɛ bamii ba mbɛmɛ ba fweele le, bo gè che bo kɛnɛ won wuchii. Ntaɲ wu ɲwa wunɛ baan gè bee ki bo jù bɛ lɛme chí bamii ba n'yeyɛ ba chimbian ba gè jienyi bo gee, ki bo ju bɛ kinche kinyien yi kinjan wu n'yeyɛ wu bamii banɛ gè too bɛ wu lɛ wu ka. Bitá san ɲwa wunɛ wu baan wu jiinɛ geh nyu fiɛ fi bamii ba n'yeyɛ ba chimbian banɛ gè duu lɛ gɛ Jiso baan wu ka wu kâase wu tô gɛ. Wu jɛme lɛ fiɛ fi gee Jiso fɛ wu she yo ki wu tô le nje gɛ Nyo goone lɛ muh mu ge wu lêɛ gɛ.

Bikwɛɛ bi mwɛɛ mù le a ɲwa wunɛ le

1:1-2 Fɛɲkɛɛ

1:3-21 Kinche ki bamii ba Kletu

2:1-22 Kune kinɛ ki bamii ba n'yeyɛ wu chimbian mo ɲgɛ wù lé wu gê wu tô fɛ bo le

3:1-18 Juu chi Kletu lé wu kâase wu tô

¹ Le mɛ wù Samon Bitá, nle mwa lɛme wu Jiso Kletu ɲka nyume mwa ye wu ntun. Nsanɛ ɲwa wunɛ fɛ bɛɲ ba fi mbɛmɛ wù le wù shan yɛɛɲyɛɛɲ nje wese, fede yi Jiso Kletu wù le Nyo mo Mbvuse wese besabɛɲ wù to wu gee mwɛɛ chaan.

² Nyo dûnyɛ fitele fi jonɛ fɛ bɛɲ le wu ka wu nyâ bɛɲ bɛ muntele mù nyiɛgee chuule, fede yi bvufɛɛ

bvù bɛɲ kɛmɛ kune Nyo bɛ Jiso wù le Tada wese besabɛɲ.

Kinche ki bamii ba Nyo le wu tɛɛɲ wa wu cha

³ Bvungá bwe bvù le bvú Nyo le bvú nya wa besabɛɲ mwɛɛ munchii mù bee goone mù tanlo mu ge besabɛɲ kɛmɛ kinche kǐ kage gɛ, ki bee chɛɛ kinche kǐ Nyo goone. Bvú ge noo fede yi bvufɛɛ bvù besabɛɲ kɛmɛ kune Nyo wù le wu tɛɛɲ bee ki bee lee bvukugɛ bɛ bvujonɛ bvù le bwe le.

⁴ Le yi yinɛ je le yǐ wu jienyi yu fɛ wu nya besabɛɲ mwɛɛ mù kuge baan mu ka jonɛ mu fede mwɛɛ munchii nyume mu mù wu gɛ ka. Mwɛɛ munɛ le ki mu gɛ wu le bɛɲ lɛgɛ mwɛɛ mù mbefe yi won kfunɛ le mù nyan yi ye konɛ mù chɛɲɛ bɛ bamii. Noo bɛɲ mo bɛɲ nyume je yǐ Nyo le yi le.

⁵ No fi le noo bɛɲ mo bɛɲ mɔɲ chuule ki bɛɲ bíɛ kinche kǐ jonɛ yi fitele fi bɛɲ lese yi Kletu le. Yi kinche kǐ jonɛ le, bɛɲ bíɛ bvufɛɛ fo.

⁶ Yi bvufɛɛ bvunɛ le, bɛɲ bíɛ nshe bɛ bikwɛɛ biɛna. Yi nshe bɛ bikwɛɛ biɛna le, bɛɲ bíɛ ɲkanɛ shɛɲ. Yi ɲkanɛ shɛɲ le, bɛɲ bíɛ kinche kǐ Nyo goone.

⁷ Yi kinche kǐ Nyo goone le muh kɛmɛ ntaɲ fɛ mwa bwee le. Yi ɲkɛmɛ ntaɲ fɛ mwa bwee le, bɛɲ bíɛ kinjonɛ.

⁸ Njɛmɛ nɛ nje, nɛ bɛɲ kɛmɛ kinɛ kinche, bɛɲ gɛɛnɛ bɛ ki fwe fwe, ki gɛ bɛɲ gɛ ka bɛɲ nyúme gɛh lo nɛ nchɛ gɛ, kɛnɛ bɛɲ nyú nje bamii ba tanlo bo gɛ ge fiɛɛ nje bamii ba kee fiɛɛ kune Tada wese besabɛɲ wù Jiso Kletu gɛ.

⁹ Bɛɲ kɛɛ lɛ nɛ muh baan kɛmɛ gɛ kinɛ kinche gɛ tu wu le wu feɛɲ wa yi mwɛɛ mu Nyo le, gɛ wu ka

yɛde mwɛɛ le je yĩ ndefe le gɛ. Wu le wu daayɛ wa le Nyo le wu chugɛ wa bimbefɛ bie bĩ wu gɛ shee wu gɛe fweele.

¹⁰ Boon ba bwɛɛn, fi mo fi nyume le bɛn mo bɛn mōne chuule ki bɛn gɛe mwɛɛ nyume mù duunyi le ntɛnɛ wù Nyo tɛnɛ bɛn, bɛ ncha wù wu cha bɛn, gɛ tanlo fiɛɛ shĩnshɛ bɛn gɛ. Nɛ bɛn gee noo bɛn gɛ yu bɛn to bɛn gwe yi mbɛmɛ wene le gɛ.

¹¹ Noo ba lé ba gwɛnyɛ je fɛ bɛn le yi kuge nɛ buuu, bɛn lêe bvunfon bvù kage gɛ bvù Tada wese wù Jiso Kletu wù le mbvuse le.

¹² Mo no bɛn kee wa mwɛɛ munɛ, bɛn lême tɛ yi kinchiɛɛn kĩ bɛn gɛ yu le bɛn tɛme, ngoone ki nka ntâne bɛn kune mu segechii.

¹³ N'yɛde le fi kooji noo le nkânse bɛn kune mwɛɛ munɛ no mbaan yu, wu le bɛn tâne,

¹⁴ nje nkee lo le sheshi wa shige kiyo chinɛ nyan yi ye le, no Tada wese besabɛn wù Jiso Kletu le wu ge wa nkɛɛ.

¹⁵ Mɛ mo ngoone ki mmôn nɛ chuule le sege ngeɛn wa bɛn nyu no tanlo bɛn tâne mwɛɛ munɛ segechii.

Ajii a gɛ yɛn bvukugɛ bvù Jiso le

¹⁶ Bɛn kêe le gɛ mwɛɛ munɛ mù bee gɛ jɛme bɛn le kune bvungɛ mo nto wù Tada wese besabɛn wù Jiso Kletu lé wu gɛ wu kâase wu to, gɛ nyume gɛh lo mumaɲa mù bo bose shén bo seesɛ fɛ bee maa bɛn le gɛ. Bee gɛ yɛn bvukugɛ bwe le bɛ ajii awese.

¹⁷ Gɛ bee sege Nyo wù Chiji gɛ nya wu bɛ mbɛɛnse mo bɛ bvukugɛ, jɛ bu fɛ wu wù le Bvukugɛ bvù baan le yi jɛme le, “Wunɛ le Mwa yan, wu le fitele fian. N'yuge njon bɛ wu baan.”

18 Bee kibee gè yu jε yinε yi shiide yi too sege bee gè bee besa ba Jiso yi mbegε wù yuude le.

19 No bee gè yu noo, bee mo be mεεε bee kεε nchiεεη wù fiεε fi bamii ba ntun wu Nyo gè jεme baan lo nchensεη. Fi jonε le bεη gêε bvufee yi fiεε fiyu le chuule nje fi le njε kin'yesε kɪ baan kijibε le gêεη bû Juu chi akfuun le a ge ayûu, Jiso lé wu bâan fε muntele mwεna le njε jon yi an'yule.

20 Fiεε fi kuge fi fede mwεε munchii fεnε le le bεη kεme ki bεη kêe le, gε ntun wu Nyo wumu nyume yu a Nwa wu Nyo le * wù muh tanlo wu teede bε bwe bvufee gε.

21 Fi le le gε muh wu ntun wu Nyo to wu jεme lo fiεε a ηkwajε wu muh wu wun le gε. To gee Kiyo ki Yuude bo, fε bo jεme jε yɪ jade fε Nyo le.

2

Bamii ba n'yeyε ba chimbian

1 Gεh yεεηyεεη no bamii bamu ba fweele gè ja bo bunε a bamii ntεnεε bo mbiane le bo le bamii ba ntun wu Nyo, nyu gεh tε no bamii ba n'yeyε ba chimbian le bo ge bo nyûme a bεη ntεnεε. Bo lé bo wêene bo tóo bε n'yeyε wumu wù tanlo wu chεηε bε bamii, bo mo bo fân lo Chiji Kikwεε wù gè kwe wu suun bo. Bo lé bo gè noo bo mo bo tô lo bε ηgε kimimia bo nôn yi bikwεε biboo le.

2 Bamii ba duude le bo ge bo bêge yi kinche kiboo kinyiεη le, fi finε ge bamii jême jé yɪ befe kune Je yi kinchiεεη.

* 1:20 kεnε le, “wù muh tanlo wu chiεeyε kinyi kiyu bε bwe bvufee gε.”

³ Kin'yɛɛ ajii yi mwɛɛ le, lé ki gɛ bo sɔɲe mwɛɛ mwɛna bɛ bɪnfɛ bi chimbianaɲ bɪ bo seese. Bamii bayu banɛ le Nyo gɛ seese wa ɲgɛ wuboo baan lo, wu nyu fo wu chiɛne bo.

⁴ Bɛɲ kɛɛ lɛ Nyo gɛ baan bajɛ gɛ banchɛndaa baa ba gɛ ge bimbefɛ gɛ. Wu gɛ be wu shiishɛ bo, bo gɛɛɲ kijusɛ ki ɲgɛ le, wu leese bo yi bancha le a bintuge bɪ jime nɛ kfukfukfu le, fɛ bo lé bo nyɔme fo gɛɛɲ bú juu chi nsa.

⁵ Wu gɛ baan bajɛ gɛ tɛ wonɲ wù fweele sege wu gɛ chiɲsɛ joo yi to yi mi wonɲ wu bamii ba gɛ chee gɛ nche wù Nyo goone gɛ. Wu gɛ be wu bajɛ gɛh nyume Nyua wù gɛ feeji lɛ bamii chɛɛ kinche kɪ chaan a Nyo jii, bɛ bamii bamu bvusooshwi.

⁶ Wu gɛ be wu chiijɛ kilaantɛɲ kɪ Sodom bɛ kɪ Gomola wu tonɲ bɛ ɲgu bi fie bi bwɛ, fi ge finɛ tu fi nyu nje ɲɲɪɲ wù fiɛɛ fi lé fi gɛ fi kɔoshe bɛ bamii ba chee gɛ no Nyo goone gɛ.

⁷ Geenɛ, wu bvusɛ Lod wù gɛ chee kinche kɪ chaan, ye woonɲ wu bɛ kinche kinyiɛɲ kɪ bamii ba befe gɛ kɛme.

⁸ Mwɛɛ mù muh wù chaan wunɛ gɛ yɛne wu ka wu yuge no wu gɛ chee a bo ntɛnɛɛ gɛ bee mu ge fitele fie fi yuude tu fi wɛse aju achii yi gee chiboo chɪ befe le.

⁹ Nɛ mwɛɛ munɛ gɛ kooshe noo, tu fi duunyi lɛ Tada kee ki wu bvûsɛ bamii ba chee no wu goone yi ɲgɛ le, wu ka wu kee tɛ ki wu gɛɛ bamii ba chee kinche kɪ le gɛ kɪ chaan gɛ yi ɲgɛ le, gɛɛɲ bú juu chi nsa.

¹⁰ ɲgɛ wunɛ, wu bamii bamu le wu ge wu fê lo wu muh wuchii. Bobaa bamii le ba koɲe ki bo bɪi nyume fiɛɛ fi ye yiboo yi ɲwɛɲe goone, nyume fi fi

chenje be muh. Ka nyume bo bò jode muh wù sage bamii fekúu.

Nyo lé wu gê wu lêshê bamii ba n'yeyê ba chimbian

Bamii ba n'yeyê ba chimbian banê le ba yune bikwêê, bo chiaase ye baan, bo faane gê ki bo nâanyi biyo bî fêwe bî keme bvun̄ga bvù baan gê.

¹¹ Mo banchendaa ba Nyo ba keme bvun̄ga bo ka tēeme bo fede bo, gè to bo mon̄ ki bo kooyi mwêê yi biyo binê le a Tada fwe gê.

¹² Geenê bamii banê gee mwêê nyume mù kilēmê kiboo goone nje nyán yi nchvuun̄ to yi gee mwêê nje yi kwaji lo, yi nyume gê lê bamii ge bo kôoyi yi bo sêeyi lo. Bamii bayu banê le ba naanyi mwêê nje bo kee mu sên. Nyo lé wu lêshê bo geh̄ nje nyán yi nchvuun̄ chinê,

¹³ nlan̄ wuboo le nyûme ngê wù bo lé bo yêne nje ngê wù bo chi too be wu. Bo to bo kwaji lê ki bo wude mwêê bo ka yaane lo mwêê fenshe ngaan̄ le lo njon̄ wumu fê bo le. Bo le lo ngilê a bēn̄ ntēnē bo yiise bēn̄. Sege bo jii mwêê bena bo, bo tu bo yuge njon̄ ki bo lēde bēn̄ be gee chiboo chi kinchoosê.

¹⁴ Ajii aboo to a nyume geh̄ nyu a kinjan̄, bo fufe gê yi bimbefê le gê. Bo to bo lēbe bamii ba wēeyi yi mbēmê le lê be bo gēe bimbefê. Kin'yêlê ajii le ki lee wa yi kilēmê kiboo le. Bo le bo jo wa lon̄.

¹⁵ Bo le bo chinê wa je yî kooji le bo jo nyu yî achiji. Bo le bo jo kikaa ki Balaan̄ wù mwa Bēwu wù gè bēmê ki wu gē fiē fi kooji gê nje wu kon̄e bige.

¹⁶ Jaki wamê wu yi fiē fi befē finê le. Jaki wù to wu jēmê gê, gè jēmê nje muh wu wun̄, wu chi gee chi kijedê kî muh wu ntun̄ wu Nyo wunê gè gee.

¹⁷ Banε bamii ba n'yeyi le nje jwe wu joo wù joo baan γε yi bude fo γε, ka nyume nje kimbe kǐ gwe akfuun, nfun fe wu tuu. Nyo le wu seesε wa kijuse ki jime nε kfukfukfu, wu γεε bo le.

¹⁸ Bo kune jwe baan bo chiaase ye achiji. Bo lεεbe bamii bò lege geh lo bo bude antenεε a bamii ba kee γε fiεε fi kooji γε. Bo lεεbe bε n'yeyε wu lε tanlo bo kâase bo gēε mwεε mu nyien mù ye yi ηwenje goone.

¹⁹ Bo jade bo jeme bamii le lε γε bo kemε ki bo nyûme nfa yi fiεε fimi le γε, geenε bo bayu kibεε ba jeme baa le nfa yi mwεε mù chenje bε ye yi muh. Bo le nfa nje nε muh nya kikwεε ke fiεε le tu wu le nfwa wu fiεε fiyu.

²⁰ Ben kēε lε nε bamii lege wa mwεε mù chenje bε bamii ba yi won kfune le nje bo kee wa Tada wese besaben wù Jiso Kletu wù Mbvuse, bo kaase bo gεen bo lee mwεε muyu le, mu diin bo mu kemε, mwεε mo mu fô lo yi bo le mu fê lo no mu chi shee mu nyume fweele.

²¹ Bamii nε ge noo tu fi bee jonje lε keefe mwεde ya wu kēε je yi kinche kǐ chaan γε, fede ki wu kēε wu ka wu kaase wu chinε nchi wù yuude wù ba nya bo le.

²² Kfuu chi bobaa bamii gee fiεε fi le a ngan le fi mo nyume nchiεen lε, “Bvu to yi yan mwεε yi kaase yi ka yi tu fo yi ji.” Wumu ka nyu lε, “Ba to ba chuge finyunja fi kaase geh fi gεen fi tu fi binse binchaja le.”

3

Juu chí Tada le wu kaase wu to

¹ Nsáa yaŋ yi shén, ɲwa wù mɛɛsɛ wunɛ le wù kingane kinfɛɛ wù nsan fɛ bɛɲ le. A banwa banɛ le bachii nsan ntane bɛɲ, le ɲkanʂɛ bɛɲ, bɛɲ kɛme banƙwajɛ ba kooji.

² Ngoone le bɛɲ ntáne mwɛɛ mù bamii ba ntun ba Nyo ba yuude gè jɛmɛ fweele le mu lé mu ge mu kôoshɛ, bɛɲ ntáne tɛ mwɛɛ mù boon ba ntun ba Jiso bena gè jɛmɛ bɛɲ le le Tada wù le mbvuse le wu jɛmɛ le bɛɲ gêe.

³ Fiɛɛ fi baan fi bɛɲ kɛɛ le le ge doo nyume aju a fɛkimɛɛɛ, bamii ba kichwɛɛɛɛ lé bo já bo tô bo kɛ bo chwêɛɛɛ, bo gêe mwɛɛ mù mbefe mù nyan yi ye yiboo goone.

⁴ Bo lé bo chwêɛɛɛ bo duu le, “Wu gè ka le wu lé wu kâase wu tô, wu le faan mɛɛɛɛ? Mo no bachiji besa gè yu wa bo kwe, mwɛɛ munchii lɛme gɛh bikaa le no mu gè shee mu nyume kɛge fɛɲkɛɛ no Nyo gè fɛ won.”

⁵ Bo jɛme noo bo kee nɛ chuule fɛ bo faɲɛ le Nyo gè jɛmɛ gɛh nyume jɛ fweele kibvulɛ mo ki nyume yu. Wu jɛmɛ, nshɛɲ bu a joo, wu gè fɛ nshɛɲ yiye nyume bɛ joo.

⁶ Le gɛh tɛ joo yiye yinɛ yĩ gè bu yi banɛ nshɛɲ, yi mo yi lɛɛshɛ won wù gè shee wu nyume fweele.

⁷ Le gɛh tɛ jɛ yiye yĩ wu gele kibvulɛ ki mɛɛɛɛ bɛ nshɛɲ, wu chieɛne ɲgu yu. Wu chieɛne nyu juu chĩ wu lé wu gè wu sâ bamii ba chee gɛ no Nyo goone gɛ, wu lɛɛshɛ bo.

⁸ Geene nsáa yaŋ yi shén, keefe bɛɲ dâayi fiɛɛ fimimia le fɛ Tada le juu chimimia le gɛh yɛɛɲyɛɛɲ nɲɛ bilun chvuge, bilun chvuge nyume gɛh yɛɛɲyɛɛɲ nɲɛ juu chimimia.

⁹ Gε Tada chiide lo ye no bamii bamu kwaji, ki wu gê no wu gè ka wa gε. Wu kaane nyume shén bε bεη, nje gε wu goone le muh lêse gε. Wu goone nyu le bamii bachii kûse muntele muboo.

¹⁰ Juu chí Tada lé wu káase wu tô lé tô nyûme nje chi choη. Abvu kibvule lé ki jûme fεwεεwe ki mo ki lêse, ηgu fleese mwεε mù fεwe, nshεη bε mwεε munchii mu fie mu bwε.

¹¹ No ηgu lé wu gε wu fleese mwεε munchii a yine je le, bεη kwaji le bεη tanlo bεη nyû kfuu chi bamii ba nεε yi kinche kena le? Bεη kεme ki bεη nyûme bamii ba chee kinche kî yuude bεη nyû bεη nya bikwεε biεna Nyo le,

¹² bεη chiεne Juu chi Nyo chine, bεη mône ki bεη gê le chi yanse chi to. Le juu chí ηgu lé wu fleese kibvule ki fie, kiyufe fleese mwεε mù le fεwe mu buη.

¹³ Geenε, besabεη chiεne gεh nyu kibvule kinfεη bε nshεη yifien yî Nyo gè ka, kfunε wonη lé tô nyûme gεh kinche kî chaan fo maa.

¹⁴ Noo nsáa yan yi shén, no bεη chiεne mwεε mune nε, bεη mône chuule ki bεη nyû ηgile sεη, jiale sεη a Nyo jii, mo ki bεη nyûme yi nyiεgee le bena Nyo.

¹⁵ Bεη tâne le Tada wese besabεη kaane shén nε, wu nyaa gεh nyume kife ki wu lé wu bvûse bamii bo ge bo bônε. Fieε fine le fi mwa bwee wese wù Bol wù le fitele fiesa besabεη gè san fε bεη le bε bvufee bvù Nyo le wu nya wu le.

¹⁶ A banwa bachii ba wu san le wu jεme yo kune fieε fine. Wu san mwεε mumu mu tεeme fε bamii le ki bo kêε, noo biyun bi bamii ba kee gε fε bo lεme fo gε mo bo fiise kinyi ki mwεε muyu, nyume gεh

yεηyεη no bo fiise tε mu a manjuu mamu le a Nwa wu Nyo le. Bo gee noo, bo tεηe nyu ηγε yi bikwεε biboo le.

¹⁷ Nsáa yan yi shén, no bεη kee wa mwεε mune nε, bεη mo bεη jóde kife bε bamii ba ηgode banchi ba Nyo banε, bo lé bo tó bo chíi bεη bε gee chiboo chí befe bεη já fε bεη lεme wa fo fiεε shiηshi gε bεη gε, bεη kaase bεη gwe lo.

¹⁸ Geenε, bεη kûu lo yi nfih wu Tada wese besabεη wù Jiso Kletu wù Mbvuse le wu nya bεη yu. Bεη ka bεη kêe wu bεη gεne lo fwe fwe. Mbεηse nyume fε wu le mεese mo segechii wu kage gε. Fi nyûme noo.

Nchane (Ncane)
The New Testament in the Ncane language of
Cameroon: Nchane (Ncane) (New Testament+)

copyright © 2020 Wycliffe Bible Translators, Inc.

Language: Nchane (Ncane)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-16

PDF generated using Haiola and XeLaTeX on 19 Dec 2025 from source files dated 16 May 2025

5108ebb0-51ad-5d6b-94ef-93cc302ed337